

Chakula cha Uzima

Yesu akawaambia, Mimi ndimi chakula cha uzima.—Yohana 6:35.

“Mimi ndimi chakula cha uzima,” Mwasisi, Mstawishaji, Mtegemezaji wa uzima wa kiroho wa milele.... Yesu anajiwasilisha Mwenyewe chini ya kielelezo cha mkate wa mbinguni. Kuula mwili Wake na kuinywa damu Yake humaanisha kumpokea Yeye kama Mwalimu aliyetumwa kutoka mbinguni. Kumwamini Yeye ni muhimu kwa maisha ya kiroho. Wale wanaojilisha Neno la Mungu hawashikwi njaa, hawaoni kiu kamwe, kamwe hawatamani mema yoyote yaliyo juu au yaliyotukuka Zaidi.

Yesu alitangaza maana ya maneno Yake kwa uwazi sana kiasi kwamba hakuna anayepaswa kujikwa juu yake. Kauli Yake kuhusiana na kuula mwili na kuinywa damu ya Mwana wa Mungu inapaswa kuchukuliwa katika mtazamo wa kiroho. Tunaula mwili wa Yesu na kuinywa damu Yake kwa imani pale tunapomshikilia kama Mwokozi wetu.

Kristo alitumia mfano wa kula na kunywa ili kuwakilisha ule ukaribu na Yeye ambao wote lazima wawe nao ambao hatimaye wanakuwa washirika pamoja Naye katika utukufu Wake. Chakula cha kitambo tunachokula kinafyonzwa, kikiupatia mwili nguvu na uimara. Kwa namna hiyo hiyo, tunapoyaamini na kuyapokea maneno ya Bwana Yesu, yanakuwa sehemu ya maisha yetu ya kiroho, yakileta nuru na amani, tumaini na furaha, na kuimarisha nafsi kama chakula cha kimwili kinavyoimarisha mwili.

Haitoshi kwetu kujua na kuyaheshimu maneno ya Maandiko. Sharti tuingie katika uelewa wake, tukiyasoma kwa bidii.... Wakristo wataonesha kiwango ambacho kwacho wanafanya hivi kwa ubora wa tabia yao ya kiroho. Tunalazimika kujua matumizi ya kivitendo ya Neno kwenye ujenzi wa tabia zetu binafsi. Tunapaswa kuwa inahekalu matakatifu, ambayo ndani yake Mungu anaweza kuishi na kutembea na kufanya kazi Yake. Kamwe hatupaswi kujitahidi ili kujiinua wenyewe juu ya watumishi ambao Mungu amewachagua kuifanya kazi Yake na kulitukuza jina Lake takatifu. “Ninyi nyote ni ndugu.” Hebu na tulitumie Neno hili kwa kila mtu binafsi, tukilinganisha andiko kwa andiko.

Katika maisha yetu ya kila siku, mbele ya ndugu zetu na mbele ya ulimwengu, tunalazimika kuwa wafasiri hai wa Maandiko, tukimletea Kristo heshima kwa kudhihirisha upole Wake na unyenyekevu Wake wa moyo. Kadiri tunavyokula na kuumeng’anya mkate wa uzima, ndivyo tutakavyofunua tabia linganifu. Kwa umoja wetu, kwa kuwahesabu wengine kuwa bora kuliko sisi wenyewe, tunalazimika kubeba ushuhuda ulio hai wa nguvu ya ukweli kwa ulimwengu

Watu wanapojisalimisha kwa Mungu kabisa, wakiula mkate wa uzima na kuyanywa maji ya wokovu, watakua na kufikia kimo cha Kristo. Tabia zao zinaundwa na kile wanachokula na kunywa. Kupitia kwa Neno la uzima, ambalo wanalipokea na kulitii, wanakuwa washirika wa asili ya Mungu. Kisha.... Kristo, sio mwanadamu, anatukuzwa (The S.D.A. Bible Commentary, Ellen G. White Comments, vol. 5, 1135).